



Iskrica mudrosti iz Poslanikove svjetiljke (Meka)

Hatib: dr. Abdullah ibn Avad el-Džuheni

21. redžeb 1442. po Hidžri / 5. mart 2021.

Sva hvala i zahvala pripadaju Allahu. Njega hvalimo, od Njega pomoć i oprost tražimo, i Njemu se utječemo od zla naših duša i naših loših djela. Koga Allah uputi, niko ga u zabludu ne može odvesti, a koga On u zabludi ostavi, niko ga ne može uputiti. Svjedočim da nema boga osim Allaha, Jedinog, Koji druga nema, i svjedočim da je naš vjerovjesnik Muhammed, sallallahu alejhi ve sellem, Njegov rob i poslanik. *"O vi koji vjerujete, bojte se Allaha istinskom bogobojažnošću i nipošto ne umirite osim kao muslimani!"* (Ali Imran, 102)

"O ljudi, bojte se Gospodara svoga, Koji vas je stvorio od jedne osobe, od koje je njen par stvorio, a od njih dvoje mnoge muškarce i žene rasijao. Bojte se Allaha, Čijim imenom jedni druge molite, i čuvajte rodbinske veze. Allah vas, doista, nadzire." (En-Nisa, 1)

"O vjernici, bojte se Allaha i govorite samo istinu, On će vas za vaša dobra djela nagraditi i grijehе vam vaše oprostiti. A onaj ko se Allahu i Poslaniku Njegovu bude pokoravao – postići će ono što bude želio." (El-Ahzab, 70–71)

Najistinitiji govor je Allahova Knjiga, a najbolja uputa je uputa Muhammeda, sallallahu alejhi ve sellem. Najgore stvari u vjeri su novotarije, svaka novotarija je zabluda, a svaka zabluda vodi u Vatru.

O ljudi, oporučujem sebi i vama bogobojažnost. Ko se Allaha bude bojao, On će ga zaštititi i od svakog zla spasiti. To je Allahova oporuka svim Njegovim stvorenjima, prvim i kasnijim, kao što kaže Uzvišeni: *"Mi smo onima kojima je data Knjiga prije vas, a i vama, već zapovjedili da se bojite Allaha."* (En-Nisa, 131)

O muslimani, Allah, džellešanuhu, poslao je Svoga Poslanika s uputom i istinitom vjerom, da je uzdigne iznad svih vjera, makar to bilo krivo nevjernicima i





idolopoklonicima. Poslanik, sallallahu alejhi ve sellem, predano je radio na uspostavljanju ibadeta Allahu, džellešanuhu, Jedinom, Koji druga nema, i zaštiti institucije tevhida – čiste vjere u Jednog Boga od paganskih običaja i primjesa novotarije i izmišljotina, kako bi svoj ummet poveo putem sreće i spasa na dunjaluku i ahiretu. Allahovi robovi, ovaj časni hadis, iz Poslanikove riznice, koji ću citirati, predstavlja čvrsti temelj u izgradnji svijesti o Allahovom nadzoru, ispunjavanju Njegovih prava, osloncu na Njega, prepuštanja svih stvari Njemu, ostvarenju tevhida – Božije jednoće i obožavanja samo Njega i čvrstog uvjerenja da su stvorenja nemoćna i da im je potreban Allah. Imami Ahmed i Tirmizi bilježe od Ibn Abbasa, radijallahu anhumu, da je rekao: “Jednog dana sjedio sam iza Poslanika, sallallahu alejhi ve sellem, na jahalici, a on se okrenuo prema meni i rekao: ‘O dječaće, naučit ću te nekoliko stvari: Čuvaj Allaha, naći ćeš Ga na svojoj strani. Kada nešto tražiš, traži od Allaha, i kada tražiš pomoć, traži je od Allaha. Znaj da, kada bi se svi ljudi ujedinili da ti kakvu korist priušte, ne mogu ti je priuštiti, osim ako je Allah to već propisao. A kada bi se svi ujedinili da ti, na bilo koji način, naude, ne mogu ti nauditi, osim onoliko koliko je Allah unaprijed propisao. Pera su podignuta, a listovi su se osušili.” U Ahmedovoj verziji dodaje se: “Znaj za Allaha u lahkoći, On će znati za tebe u teškoći, i znaj da je u strpljivom podnošenju neugodnosti veliko dobro za tebe, i da pobjeda dolazi sa strpljivošću, izlaz s nedaćom i olakšanje s teškoćom.” Ovi Poslanikovi sveobuhvatni i prosvjetljujući savjeti otkrivaju veličinu i uzvišenost islamskog učenja, utemeljenog na čvrstim temeljima ibadeta i snažnoj i stalnoj vezi s Allahom, i opskrbljuju čovjeka potrebnom duhovnom snagom, koju crpi od Jakog i Silnog. O čovječe, nastoj, koliko god je to moguće, da razmišljaš o ovim značenjima, da podsjećaš svoju dušu na njih i postupaš u skladu s njima, kako bi imao korist od toga na dunjaluku i ahiretu.

O vjernici, Allah je ovoj zemlji ukazao čast da sudi po Njegovoj Knjizi i sunnetu Njegovog Poslanika, sallallahu alejhi ve sellem, da provodi šerijatske sankcije i pravdu prema svim njenim stanovnicima, a plod toga je sigurnost, blagostanje, politička i ekonomska stabilnost, koju im je Allah dao, neka Mu je hvala na početku i na kraju,





“KOLIKO GOD ZNAČAJNA ULOGA HATIBA BILA ZA USPJEH NJEGOVE HUTBE,
NIŠTA MANJE NE ZAOSTAJE NI ODABIR TEME, ODNOSNO MATERIJE
KOJU TOKOM HUTBE ELABORIRA.” (PREPOROD)

HUTBE 

u tajnosti i javnosti. Zbog toga su se naša zemlja, njene vlasti, učenjaci i stanovnici našli na meti raznih neprijatelja, ali i pored svih nemilosrdnih nasrtaja, uz Allahovu pomoć, ova država stoji stameno i uspravno. Ko god joj bude želio zlo, Allah će ga poniziti i vratiti mu njegovu spletku. Allahu moj, čuvaj nam našu vjeru, učvrsti nas u njoj sve dok se ne sretnemo s Tobom i čuvaj zemlju Dva harema od svakog zla i neugodnosti.

Donosite salavate i selame na prvaka svih poslanika i predvodnika bogobojaznih našeg vjerovjesnika Muhammeda, sallallahu alejhi ve sellem, to vam je naredba od vašeg Gospodara u Njegovoj Knjizi: “Allah i meleki Njegovi blagosiljaju Vjerovjesnika. O vjernici, blagosiljajte ga i vi i šaljite mu pozdrav!” (El-Ahzab, 56) Allahov Poslanik, sallallahu alejhi ve sellem, rekao je: “Ko na mene donese jedan salavat, Allah na njega donese deset salavata.”

